

# Cuntenta cun la disciplina dal budget

Fracziun dal cussegl grond da la pbd

■ (cp) **La fracziun dal cussegl grond da la pbd ha fatg glindesdi, ils 2 da zercladur 2014 a Schuders sia seduta da la fracziun per preparar la sessiun da zercladur dal cussegl grond. La fracziun è sa radunada sut il presidi dad Andreas Felix ed en preschientscha dals cusseglers guvernativs en uffizi Barbara Janom Steiner e Hansjörg Trachsel.** Medemamain preschent è stà il futur cussegljer guvernativ *Jon Dominic Parolini*. En il center da las discussiuns èn stadas las fatschentas da la sessiun da zercladur. Ils preschents han prendì enconuschientscha dal rapport annual e dal quint annual 2013 ed als han approvà. Il quint annual 2013 serra cun in gudogn operativ da +39,5 miu. francs e conferma la gestiun rigurusa da las finanzas chantunalas tras la directura da finanzas, la regenza e l'administraziun. Il resultat total negativ da -33,5 miu. francs deriva surtut da las amortizaziuns extraordinarias da las valurs cu-

deschadas en connex cun la participaziun da maiortad a la Repower che la pbd valitescha anc adina a moda critica.

La debatta preliminara concernent la revisiun parziala da la lescha davart la cassa da pensiun è incontestada. La fracziun considerescha la revisiun parziala preschenta sco proposta per ina soluziun pragmatica per resguardar il fatg ch'ils assicurads vivan adina pli ditg. Las mesiras proponidas stabiliseschan surtut la situaziun per ils assicurads activs e pli giuivens che na ston betg pli finanziaziar las rentas fixadas da la lescha federala ed a medem temp anc patir da prestaziuns reducidas. La revisiun parziala preschenta para moderada e commenturada suenter che las adattaziuns necessarias dals ultims onns areguard il tschains tecnic e la tariffa da conversiun cun reduziuns da prestaziuns da rund 10% han stuì vegnir purtadas sulettain da la cassa da pensiun e dals assicurads. La repartiziun paritetica da

las contribuziuns supplementaras en relaziun da mintgamai 50% a quint dals patruns e dals lavurants chatta il consentiment da la fracziun.

Ina debatta preliminara davart la lescha per promover il sport ed il moviment è incontestada. La fatschenta ha però chaschunà vastas discussiuns. La fracziun disturba la formulaziun nunlianta dal text da lescha che n'exprima betg senz'ater in'orientaziun strategica e concepziunala da la promoziun dal sport. La fracziun spetga correcturas substanzialas en il rom da las discussiuns en il cussegl grond.

Il rapport davart la promoziun d'uffants e da giuivens en il chantun Grischun e l'adesiun al Concordat svizzer da las scolas autas na chaschunan naginas discussiuns.

Las ulteriuras fatschentas da la sessiun da zercladur vegnan tractadas en il rom da la cuntinuaziun da la seduta da fracziun mardi, ils 10 da zercladur 2014.